

No Hasi Kos di Bestia

Ora palestinonan ta mara eksploivo na nan kurpa i eksplot'è na un sitio ku hopi israelí presente, algun grupo no tin ku nes ku e mortonan humano. Ma ora palestinonan a karga un buriku ku eksploivo ku e mesun meta, e mesun gruponan a protestá fuertemente e krueldat kontra e **buriku**...

Esei no ta kos di bestia? Kua tin prioridat anto: bestia òf hende? Si bo ta un evolushonista, bo kontesta onesto mester ta, “Tur dos ta mes importante!” pasobra segun evolushon hende ta simpelmente un bestia...sinembargo e bestia mas inteligente.

En kontraste, Beibel ta mustra ku Dios a krea piská, para, i tur otro bestia (Génesis 1:9-25). Despues, El a krea hende...un kreashon spesial i úniko! “*Dios a krea hende segun Su mes imagen; segun e imagen di Dios El a krea hende; hònber i muhé El a krea nan*” (Génesis 1:27). Hende no tin mesun antepasado ku bestia. Ningun bestia ta kreá den imagen i semehansa di Dios ...hende so!

Dios tambe a duna hende outoridat pa “*yena e tera i hasi esaki someté na bo; i goberná riba e piskánan di laman i riba e parhanan di shelu, i riba tur ser bibu ku ta move riba tera*” (Génesis 1:28). Nos Kreador a duna hende responsabilidat pa **atministrá i kuida** Su kreashon. Den era di Noé, Dios a duna di konosé ku hende por kome karni di bestia tambe. “*Tur loke ta move, ku ta biba, lo ta kuminda pa boso...*” (Génesis 9:3). Pues, segun Skritura, **hende ta liber pa usa loke Dios a krea (inkluyendo bestia), ma no malusa òf abusá di dje.**

Pa para riba ku hende no mester mishi ku bestia ta ridíkulo. Asta e “amante di bestia” mas ekstremista ta probechá di bestianan. Un vegetariano ta bebe lechi òf kome webu, ta usa kosnan trahá di kuero i lana, ta kome e frutanan i bèrdura plantá den tera fertilisá ku mèst di bestia. E ta benefisiá di hopi deskubrimentu sientífiko ku a kita bida di tantu bestia. (Tratamentu eksitoso pa diabétis [suku] a wòrdu deskubrí komo resultado di eksperimentonan sientífiko hasi riba kachónan.) Bestia ta kousa enfermedat i skarsedat di kuminda na paisnan ku no ta kontrolá nan. E Plaga Pretu a mata 25 porshento di poblashon di Oropa 700 aña pasá—kousá entre otro pa djakanan infektá. Awendia nos tin miedu di enfermedat di “baka loko”. Kualke kunukero sa si e no ta mata òf kore ku bestia, nan lo kome tur su kosecha. I kòrda tambe ku hopi kaminda, bestia ta kome hende. **Ta klaro ku hende MESTER kontrolá bestia!**

Bestia mes ta benefisiá di eksperimentonan sientífiko hasi riba bestia ku “ekstremistanan” ta yama “kruel”. Bestia di kas ta mas salú, ta kome mihó, ta sufri di ménos enfermedat, tin mihó remedi pasobra otro bestia a muri den laboratorio. Komo resultado di eksperimentonan “kruel”, bestia di kunuku ta mas salú—for di kua nos ta haña lechi, manteka, keshi, webu i karni.

Di otro banda, **ta totalmente inkorekto pa maltratá bestia.** Minimal, un bestia sikiera mester tin awa, kuminda, i protekshon kontra solo i yobida. Ma mi a yega di mira kachó ku ta keda sin awa henter dia den solo kayente, sin dak riba kabes. Algun hende no ta duna kachó sufisiente kuminda ku e konsekuensia ku e ta mata kabritu. I tantu hende ta mara kachó na kadena demasiado kortiku i nunca ta dun'è chèns pa kore. Ora ta mata un bestia pa kome, no ta korekto pa laga e bestia sufri.

I kiko di nos tantisimo burikunan? Sterilisá nan? Ekspandé “Donkey Sanctuary”? Mata algun i mantené un sierto kantidat manehábel? Manda nan tur bèk na e pais for di kua nan a bin? Hiba nan tur na Parke Washington-Slagbaai? Lamta un snék ku ta bende “Buriku Burger”? Nos lo laga esei pa e ekspertonan disidí. Ma nos desishon mester reflehá kla ku nos ta atministradó prudente di Dios Su kreashon na nos isla. Sigur nos no mester hasi kos di bestia.